

Anc viva «nossa» brigada

Brigada d'infanteria da muntogna 12

DA GION NUTEGN STGIER / ANR

■ **A chaschun da l'ensolver per las medias ha il cumandant Franz Nager ditg ch'il stab da la brigada haja er l'ultim onn fatg in grond progress. Il 2016 fan be trais battagliuns da sis, lur servetsch en noss chantun. La Brigada d'infanteria da muntogna 12 resta activa fin a la fin dal 2017.** Ina giada ad onn envida *Franz Nager*, il cumandant da la Brigada d'infanteria da muntogna 12 ils represchentants da las medias ad in ensolver. Quel ha gì lieu venderdi a Cuira, nua ch'il brigadier è stà ospitant e referent. Dapi il 2012 è il Lucernes cumandant da la brigada cun bunamain 7000 schuldads da sis chantuns. L'exercezi «Houdini», che ha gì lieu da Tusaun fin Walenstadt saja reussì bain cun intginas excepziuns. Il center da l'exercezi saja stà sin l'areal da la resgia a Domat, nua ch'il servetsch da sanitàd saja stà la scolaziun principala. Stab e schuldada hajan lavurà bain, cunzunt vers la fin da l'exercezi. Persvas hajan uffiziers e schuldads en special quai che pertutgia tactica ed engaschi.

La Higa in success per la brigada

En acziun è in battagliun da la Brigada d'infanteria da muntogna 12 er stà tar il Forum mundial d'economia a Tavau il schaner 2015. «Plaschair avain nus cunzunt gì durant il Forum mundial d'economia da la visita dal cumandant da l'armada, a *André Blattmann*», ha menziunà Franz Nager. La relaziun

tranter la schuldada ed il schef da l'armada svizra saja stada fitg persunala. Adina puspè hajan schulds fatg cun el in schinumnà «selfie», quai che fiss strusch stà pussaivel anc avant pauc onns da far ina fotografia communabla cun il pli aut uffizer da l'armada. In vair success saja er stada per la Brigada d'infanteria da muntogna 12 l'exposiziun Higa a Cuira. Sa preschentà a la publicitàd tar questa exposiziun tradiziunala è il Battagliun d'infanteria 85, cun ses cumandat *Daniel Steiner* da Savognin. Passa 6000 personas sajan sa participadas a la concorrenza fatga durant l'exposiziun, quai che confermia l'atta-

schadadad da la populaziun tar l'armada. Ventiraivel è Franz Nager dentant er che dal schaner fin oz hajan adina puspè cussegliers guvernativs dals chantuns ch'appartegnian al la brigada visità las truppas en servetsch. Ludà ha Franz Nager cunzunt la buna collavuraziun cun cusseglier guvernativ *Christian Rathgeb*, il schef dal departament da militar dal Grischun.

In marsch da 20 km

La schuldada saja pli u main er fitta, quai haja confermà il marsch da 20 km che saja obligatoric per ils 7000 umens da la Brigada d'infanteria da muntog-

na 12. In marsch pli lung saja betg mo bun per la sanadad da la schuldada, mabain saja quel er ina buna chaussa per la collegialitàd da la truppa e per l'aspect social. Ils schuldads hajan grond plaschair da sa participar a quel marsch, ha menziunà Franz Nager. El ha ditg plinavant che ses stab s'haja sa sviluppat fitg ils davos dus onns, quai er grazia a la scolaziun ed instrucziun supplementantara. Fatg haja il stab cunzunt in progress quai che pertutgia la fasa da planisaziun d'in exercenzi, quai che saja dentant er il cas tar la fasa da realisaziun d'in exercenzi. Franz Nager ha ditg ch'el vegnia er en il futur adina puspè ad organisar exercenzis per ses stab. Exercitar ed anc ina giada exercitar, quella devisa valia betg mo per la schuldada, mabain er per ils uffiziers ed il stab da la Brigada d'infanteria da muntogna 12. Il 2016 fan be trais battagliuns la Brigada d'infanteria da muntogna 12 lur servetsch en il Grischun. In battagliun è reservà per il Forum mundial d'economia a Tavau, dentant vegnia quel strusch en acziun, ha ditg Franz Nager. Ditg ha el er ch'il rapport da la brigada haja lieu il december 2016 e betg sco usità il mais da favrer. Cuntent è il brigadier lura er che la Brigada d'infanteria da muntogna 12 resta anc in onn dapli activa e che sia istorgia va pir a fin il december 2017 empe il december 2016. Ventiraivel è Franz Nager er ch'il proxim onn resta il stab da la Brigada d'infanteria da muntogna 12 identic sco quest onn.



Franz Nager, igl cumandant da la Brigada d'infanteria da muntogna 12 ha dà venderdi in guard enavos ed in en l'avegnir.

FOTO G. N. STGIER